

17

QUÆSTIO MEDICA,
CARDINALITIIS DISPUTATIONIBUS
*manè discutienda in Scholis Medicorum, die Jovis
sextâ Martii.*

M. LUDOVICO LABBE', Doctore
Medico, Præside.



An pejor vigiliarum, quam somni, excessus?

I.

MOTU & quiete servatur omne mixtum. Motu quidem, quod fluidis; quiete contra, quod solidis; quiete verò & motu, quod solidis simul & fluidis partibus constat. Quæ motus prærogativâ donantur, aliis longè præcellunt, at multò celerius occidunt, motu enim attenuantur omnia; ideo vivens brevi corrui, quia movetur; quod vitæ est expers, diu perstat integrum, quia quiescit, & in viventium genere corpora quæ majori cidentur motu, eò brevioris sunt ævi, adeo ut simul nunquam cohæreant operis diuturnitas & motus, atque hic gradus sit ad ruinam: quæ sua tamen omnibus citior, tardior ve præstituta est, variisque acceleratur & sufflaminatur modis. Vis præfixum sibi quæque percurrant stadium? sine positis sibi legibus obtemperant; noli motus imperio subicere quæ ex naturâ quiescunt; noli perpetuæ quieti addicere quæ à summo rerum opifice comparata sunt ad motum; quæ moveri & quiescere alternatim debent, fac illas opportunè, & uti decet, vices obtineant. Ut valeat, vigeatque, & diu duret corpus humanum, ne otio torpescat, ne labore dissolvatur. Motum amica quies temperet, quietem excipiat idoneus & tempestivus labor: atque ut quietis somnus, & laboris species quædam est vigilia, somni perinde ac vigiliæ mutua sit successio, nec somnus modum excedat, nec vigilia; utriusque enim, quamquam ad vitam maxime necessarij, excessus malus. dubitas hæresque utrius sit pejor? utriusque confectaria mala perpende, & inter se confer, pejorque censeatur ille, qui & ægrius curanda, & vitæ principiis magis infensa inducit.

II.

VIGILIA functionum animalium exercitatio est, somnus earumdem intermissio. Spirituum hic quiete, illa motu continetur. Hinc obrepit somnus ubi propter vigilas, laboreve, aut longos, aut ingentes spirituum penuria est, ac qui supersunt, fibris nerveis abundè inflandis impares, relicta statione otiantur, atque ipsa cerebri moles, ductusque, per quos iter est, tum ad animam, tum ad sensuum organa, subsidunt. Desinit e contrario somnus, cum spiritus congruo refectionis pabulo, & novâ accessione locupletati, pristinis sese motibus restituant, nerveos funiculos tendunt, oclusos cerebri meatus permeant, expandunt-

que, & quoquo vèrsum excurrunt. Mirum, quæ commoda, quot fructus afferrat constans illa & moderata vigiliæ ac somni reciprocatio. Spiritus, caloremque excitat, & ad corporis ambitum diffundit Vigilia, articulos, partesque extremas firmat, alimentorum distributionem, & excrementorum, quæ necessarij ab illis extant, evacuationem promovet, appetitionem ciborum facit, sensus, motusque omnes voluntarios alacres & expeditos, mentem vegetam, perspicacem, & ad omnia paratissimam reddit; uno verbo novam quasi vitam, quæ agendi, sentiendique functionibus se prodit, cùm animo, tùm corpori inspirat. Vigiliæ succedens Somnus spirituum dispendia instaurat, nativum revocat, & reficit calorem, vires redintegrat, membrorum, sensuumque defatigationem tollit, partibus solidis ac præsertim articulis labore siccatis salutarem madorem inmittit, aptam recreati corporis constitutionem tuetur & servat, viscera roborat, stomacho vigorem addit, concoctionem juvat, animi ægritudines oblivione delet, solitudinumque perfrugium ac medela quædam est, & humanæ pars melior vitæ. Sed quam facilè, quam sæpè hæc somni ac vigiliæ beneficia corrumpuntur! plus æquo si protrahatur somnus, si diuturnior, pertinaciorque sit vigilia, quot inde & quantæ ægrotandi occasiones, quot utrimque noxæ? ex vigiliâ tamen cō graviore & magis timendâ, quò ad principia, partesque, quibus vivimus, magis pertinent, minusque remediis cedunt.

III.

IMMODERATIONES vigiliæ calorem insitum, spiritusque omnes, & qui tùm caloris, tùm spirituum commūne subiectum est, humorem primigenium, vitæque prædia absumunt, ventriculum lædunt, ejusque vires infringunt, unde cruditatum proventus, sanguinem accendunt, bilem exaggerant, corpus universum ac præcipuis cerebrum inflammant, & exsiccant, variique affectibus, quos viscerum, humorumve æstus, vel languor & marasmus corporis, vel spirituum seu tumultus, seu paupertas invehunt, causas & initia inevitabili consecutione præbent. Age nunc, quænam ab exuperante somno mala obtinunt? spiritus quidem offundit & obscurat, caloremque obrundit somnus; at eos dissipat exhauritque vigilia. Corpus ille ob superfluatorum copiam, grave, languidum & ignavum; hæc ob necessitiorum inopiam, imbecillum, impotens, & effectum reddit. pituitosi, serotini, sive humores longiore somno congeruntur; at gignuntur & acervantur biliosi & ichorosi, quoties vigilandi intemperantia est. Obstructionum ferax somnus; sed ferax etiam diutius continuata vigilia. Si plura his somni incommoda sunt, leviter certè illa & in minimis ponenda. Hæc verò utrique vitio communia videri possunt, nec magis à somno, quam à vigiliâ proficisci. Quanta interim in iis differentia? Corpus quod ex vigiliâ & somno languet, ex hoc insuper molle & laxum, ex illâ durum siccumque evadit. Obstructiones pariens materia per somnum collecta, particulas aliquas adhucdum liquidas retinet, quas vigilia consumit, disperdit. Quidquid tandem cruditatum succrescit in corpore, id per somnum à spirituum calorisque impedimento, per vigiliam autem, ab eorum defectu & dissipatione procedit. Jam verò numquid majus à partium siccitate & duritie, quam à nimia mollicie & laxitate vitæ discrimen? Numquid à biliosis, quam à pituitosis excrementis plures, ab actibus & æfferis, quam ab insipidis & fæte aqueis formidolosiores morbi? Numquid & graviore & diuturniores, qui à crassiori & penè indurato, quam qui à minùs spisso & tenaci, nonnihilque adhuc fluxili humore infarctus sunt? Numquid citior certiorque ab exhaustis, quam ab obtusis, impeditisque calore & spiritu perniciēs?

SED & ipsa somni & vigiliæ excedentis curatio rem declarat apertius, vixque ac ne vix quidem quæstioni locum relinquit. Revera, quæ adversus immodium somnum venire in usum præsidia solent, ea effectu ferè nunquam carent; carent autem sæpissimè, quæ contra vigiliæ adhibentur. Sic labor solito vehementior, acrior animi contentio, cibus parcius, potus illi nostro hoc orbe & sæculo celebratissimi, quorum alterum Caffè, alterum Thé vocant, frictio durior, punctio & vellicatio asperior, vesicatoria, cucurbitulæ, scarificationes, ipsæ etiam casu contingentes, vel arte & de industriâ injectæ sollicitudines & curæ, frequens aut valida purgatio, liquores acriusculi & spirituosi, sales volatiles Junioribus dicti vel olfacti, vel epoti, diuturniorem somnum abruptunt, aut avertunt, ipsamque in eum propensionem nimiam efficaciter expugnant. Quin etiam si soporem ut plurimum, quidni & paulò longiorem, profundiorēque somnum, tam vacuatis humoribus, à quibus infertur, quàm excitatis expeditisque spiritibus, fuge Emetica? Vigiliarum similiter multa quidem vulgò prædicari remedia consueverunt, pax animi, quæ negotiorum curarumque & ægritudinum vacuitas est, corporis quies, musica & suavis cantus, aquarum transcurrentium aut salientium sulfureus, diæta refrigerans & humectans, amygdalata, avenacea, hordeata, & emulsionum species variæ, balneæ, lactis sed potissimum asinini, ferique illius potus, ac demum quæcumque ex lactucâ, nymphæâ, similique virtute præditis herbis parantur decocta, frontalia, syrupi, aliaque id genus, quibus Ars Medica abundat, aut potius laborat. Addunt & venæ sectionem, quæ ut princeps & præmitti cæteris solet. Isthæc porro omnia, quorum alia, nec penes vigilantem sunt, nec penes medentem; alia multum temporis, non parum apparatus, patientiæ plurimum requirunt, quo fructu, qua utilitate usurpantur? Illorum vires & Medici conatus omnes non rarò contumacior vigilia eludit, nunquam sat citò, interdum nunquam omninò conceptam expectationem explent.

V.

CUR in utroque excessu diversè ad eò succedant remedia, si quæris, in promptu causa est; alterum segnior, alterum concitator efficit spirituum motus. Hos verò præter modum agitados & quoquo versum dissilientes cohibere, quàm tardos, segnesque exstimulare, difficilius. Quemadmodum enim torrentis aquæ per alveum, quem sibi jugi & diuturno cursu fecerunt, obviis quibusque disturbatis, disjectisque oppositis aggeribus, eò rapidius volvuntur, quò validius reprimere & sustinere decurrentes tentaveris; sic spiritus, per notos tritosque calles, & ductus, vi prioris impetus & consuetudinis, maxime si via pronior, patientiorve ac facilior sit, (ut esse in nimio opere vigilantibus constat) frustra plerumque obluantibus vel potentissimis artis præidiis discurrent, nec coerceri se & in ordinem cogi, ubi certis assuevere motibus, patiuntur. Vigiliis conficiuntur & emarcescunt illi, quorum malè morata, exaltantia, arefactaque viscera; sanguis acrior, subtiliorque, & nimio plus fermentescens; cerebrum siccus fervidiūque; mens implicata negotiis, exesa curis, macerata angoribus. Quàm operosè porro restitui, ubi perierunt, sua visceribus integritas, sua cerebro tempestas, sua sanguini dulcedo, consistentia, naturalis & legitima fermentatio, sua denique menti tranquillitas possunt? Quæ tamen omnia nisi præstiteris, operam si non omnem, magnâ saltem ex parte perdis. Ad eò multa sunt, quæ, ut optatus accedat nimis

vigiliæ modus, unâ concurrant, conspirentque necesse est. Nec spem uno in Opio, cœu in sacrâ anchorâ reponas. Anceps, incertum, & fallax remedium est & periculi plenum. Unde in illius usu, ne vertatur in abusum, quæ non cautiones, quæ non animadversiones habendæ? Somnum pro Medentis nutu & arbitrio etiamsi conciliet, (quem non conciliat interdum) tempestivè & quâ copiâ assolet, ingestum, ligatis, impeditis, congelativè, aut potius peremptis spiritibus, hunc tamen non ita multo post, iisdem expeditis, solutivè aut recreatis subsequetur non minus contumax vigilia: quam, quoties à somno redit, si eadem arte compescas, cave ne sensus torpidi, hebetesque fiant, fatiscat memoria, ipsiusque ingenii vis obtundatur. Vide præterea quibus, quo in morbo, quâ manu, & quando oggeratur; obesis, gracilibus, frigidum temperamentum, & infirma nactis præcordia, malignis in affectibus, & partium interiorum inflammationibus nunquam non obest; à pastu & pleno stomacho vomitum creat; viribus accisis, & largius assumptum noctem ferream & perpetuam ut plurimum accersit. His ergo in casibus opio adversus vigilias interdictum; in licitis autem metus est semper, ne quæ in solos spiritus animales, quorum motu stat vigilia, vim exerece suam oporteret, eam in vitales quoque, à quibus pendent vitæ munia, diffundant narcotica corpuscula, aut illis intactis, tota in hos serantur. Utrumvis accadat, quanta clades? in altero, pro somno, corporis languor, ventriculi gravitas, spiratio difficilis & anhelosa, caloris & pulsus primum imminutio, & aliquantò post extinctio succedunt: in altero, horum omnium terribili comitatu fatalis somnus inferitur. Sed esto, opii particula quasi Medici præscriptis obedirent, illique dicto obedientes essent, cerebri incolas spiritus tantum afficiant, aliis, qui cerebelli sunt, pro jussu parcant; illorum cursum moderentur, non sistant; illa quoque naturali motu, spontanei compescant impetum. quid inde? hocce præsidio ulterius & de novo imminens detrimentum præcaveretur quidem, at jam factum non resarcitur. Adde quod, quæ capitur ex declinatione futuræ jacturæ utilitas, brevis fluxaque est, & recurrente postea vigiliâ perit, recurrit autem, quandiu suis fovetur causis, quas opiata non delent. Præterea semel evacuat is, à quo somnus est, humor, longiores parit inducias, & caveri, ne rursus succrescat, facili negotio potest. Si quod superstes ab illius evacuatione fermentum est, iners illud & parum actuosum, potentissimum contra & efficacissimum, quod vigiliarum auctor effectusque est.

Ergo pejor vigiliarum, quam somni, excessus.

Afferebat Parisiis MICHAEL SAUVALLE, Ebroicus,
Baccalaureus Medicus. A. R. S. H. 1692.

Apud Franciscum Muguet, Regis & Facultatis Medicinæ
Typographum.